


渠亭文豪

半部豪初刻

PL  
2705  
A4A6  
1689  
v.2









通奉大夫巡撫貴州工部右侍郎兼都察院

右副都御史加一級曹公墓誌

并銘

曹澹餘先生既卒之二年歸櫬里門予爲辭哀之  
及其葬也其兄實菴舍人復持先生自著年譜徵  
銘于予因念實菴昆季爲中外顯官二十餘年所  
交名公卿稱能言者何限而獨以屬予實菴之意  
固別有在歟其何忍辭謹按先生諱申吉字錫餘  
澹餘其別號也山東安丘人中順治十二年進士  
選內翰林庶吉士十四年授國史院編修旋擢



日講官充扈從十五年出爲湖廣右參議分守下  
荆南道十六年歷河南睢陳兵備道副使十七年  
轉左通政晉大理寺卿十八年以疾告歸康熙三  
年病痊還故職六年殿試進士充讀卷官遷禮  
部右侍郎以

上親政遣祭南嶽九年會試天下舉人知貢舉旋  
調吏部右侍郎十年改工部右侍郎兼都察院右  
副都御史巡撫貴州遭吳逆之變徇節雲南先生  
生而神氣秀穎八歲屬文拈筆輒就爲父贈宗伯



公所喜旣孤與兄貞吉奉太夫人教益勵于學卒  
皆成進士以文章行誼名于時先生顧早達十七  
領鄉薦二十一成進士二十四官方面二十六躋  
九列當其應庶常之選

世祖章皇帝方鄉文學親閱其卷擢第一自慶得  
人錫以錦袍令內侍量其長短等身衣之每兩月

一

御試先生仍屢居第一金帛羊酒之賜無虛日  
上在南苑嘗使使召先生以字不以名搢紳榮之



何

上擇詞林才堪外用者十五人先生與焉是時先生方膺殊寵皆望其有不次之擢乃被是命中外莫測一日

上謂胡學士宛委曰朕慮曹某年少未習民事姑試之耳衆始知

聖意所在詞林外轉例許爲學使者同列多縱臾之先生曰

上命將試以艱難而臣下遽請清華可乎遂出鎮



鄖陽地處楚西北鄙。亂山層峙。郭外十里皆盜區。  
先生以計撫之。歸版籍者二千餘家。海寇圍江寧。  
三楚大震。鄖正缺餉。士卒洶洶。勢將應賊。先生移  
他餉給之。重鎮以安。先生所至。得敏練聲。而尤長  
于聽獄。廷尉案牘。山積。疑信錯互。先生亭質各當  
人。以爲神會。地震肆赦殺人者。皆得不死。其爲十  
惡牽連。雖笞罪不免。先生以爲非法之平。請宥之。  
著爲絜令。及貳秩宗。磨勘場屋。試牘前此多毛舉。  
細故致干吏議者。衆先生悉酌復舊章。以寬之。復



取士用經義法請州縣得歲貢士于 廷先生前

後多所建白或報可或報聞或過時仍用其言莫  
非 朝廟典禮國家大計也入佐邦治時銓事煩

襍胥徒因緣爲奸先生持之甚嚴使僥倖者不得  
行甫三月而有撫黔之命黔中軍衛多于郡縣自  
文武途分事多掣肘先生悉心區畫奏改龍里等  
五衛爲縣併安莊等三衛所于所近州邑以一事  
權凱里有苗警諸將欲張其功爭陳按勦之利先  
生力持撫議招生苗難講輩數十寨刻木約降乃



安堵如故。又以其地荒野。人不知書。遂刊房牘。頒  
行所部。復行月課。以獎誘之。不三年。文教大洽。十  
二年冬。吳逆難作。近制撫軍。既不得握兵柄。而黔  
南大帥。又已從賊中潰。遂束手被執。當聞變之初。  
先生夜遣家僮飛章入奏。疾馳六千里。十六日而  
達都門。

上始得吳逆反狀。命將出師。扼險固守。故雖寇氛  
披猖。終不能越西津關南尺寸地。先生陷賊中。無  
日不伺間圖賊。庚申之夏。蠟書赴闕。密陳機宜。爲



賊所覺。劫歸雲南。竟遇害于昆明之雙塔寺。是康熙十九年十二月五日也。年僅四十有六。越三年癸亥四月二十五日葬于先塋之次。以兩夫人祔焉。嗚呼。當先生之赴黔南也。

上臨朝遣行。兩宴于保和殿。溫文誥誡。錫予便蕃。謂此行稱職。當必大用。

上之所以知之眷之者至矣。而所遭迺竟如斯。然先生能從容就義。死不忘。君其亦可稱無負也。夫先生高祖諱一麟。丙辰進士。吳江知縣。曾祖



諱應埴太學生遵化縣丞贈徵仕郎光祿寺大官  
署丞祖諱銓太學生光祿寺署丞考諱復植諸生  
兩世皆以先生貴累贈至通奉大夫禮部右侍郎  
加一級妣劉氏相國少傅公女累封至太夫人初  
娶鄒氏封淑人贈夫人前先生十九年卒再娶魏  
氏封夫人後先生九月卒子男五人長沆次灃廕  
生候選七品京職次濡俱早卒次澈次通女三人  
享孫男曾衍先生長身玉立風骨稜稜好孤行一  
意意所不與屹然如山嶽不可奪卽嚙笑之微不



有輕以假人。然性純孝。家政非稟太夫人命不敢行。與兄處。終身無間言。又推其意以厚外家。外王父少傅公沒。兩舅氏羈棲京邸。左右萬端。疾痛苛癢。若身受之。其爲文章。清適粹美。而尤長于歌詩。早學。右丞嘉州自南嶽回。沈鬱頓挫。人比之少陵。夔州以後。蓋先生酷嗜讀書。日新富有。遂臻絕境。非盡得江山之助也。所著有澹餘南行黔行黔寄諸集若干卷。凡此皆先生立身學問之大爲政事節義所由基者。故備著而銘之。曰。



畢如者丘在彼東郭草堂之前。回環岡道。九九松  
柏。哲人之阡。哲人伊何。苾寒色正。其氣浩然。弱冠  
脫穎。踐敷中外。隄二十年。恭承

帝命。專城秉鉞。檣柱南天。逆孽忽逞。刑天相柳。諧  
滇。浩黔公抱國恥。伏節死義。風烈攸傳。史有金  
管

朝有愍綸。銘以俟焉。

體大思精。章安句適。金石之文。固應以醇厚光

明爲正則也。  
王敷彝



單表殉節一事筆直而思曲結束處祗徊欲絕

○銘法古

汪蛟門



益都楊君搢珽墓誌并銘

昔在漢興黜嫺飾而崇敦樸故其時長者之聞獨  
多于近代乃至子今毋論絕無其人卽士之趨操  
稍有慕近之者亦爲當世所賤簡通經學古謂爲  
無用規言矩行目爲迂闊寧知先進遺風不與世  
運漸盡者端賴此羣相嫺侮爲不足趣時合變之  
一二人也邪吾於搢珽楊君有取焉余初未識搢珽  
癸卯之秋求書青郡久之得數十軸幾盡一時名  
俊矣于中得君章草一紙純質古雅絕得皇索遺



意心頗異之方欲以物色求其人而搢珽已儼然  
在門。傾蓋握手忘年定交不啻若平生歡然後知  
搢珽與余交相慕悅非偶然也。厥後余每過青社  
帽。帚未除旋聞剝啄聲必爲搢珽。雖人事叢沓亦  
不遽去坐語常至移晷有明慶曆間郡中多逸民  
宿老皆知崇尙翰墨如洋溪吟社海岱文會諸遺  
事搢珽猶得聞其厓略抵掌譚說先正流風娓娓  
可聽至法書名畫沿討尤詳賞鑑收藏其源流統  
緒如指一二又嘗冬日詣余著華陽巾披鶴氅裘



其子撰杖後從端拱而過青都之市市人皆愕眙  
指顧君乃從頌曳履游行自如余揖之入室時賓  
客盈坐余偶有所激與客放言極論遂相談笑爲  
已甚之辭搢珽從座上默聽以爲誠然也他日相  
見搢珽更究前說叩其顛末余愧無以應自是向  
人不敢復作諧語於乎此吾于搢珽有取也搢珽  
諱珽始祖賽典赤至自默德那國爲元佐命居宛  
平累世皆襲王爵迨伯顏察兒復以淮王尚主佩  
金虎符入明有莫蘇者奔益都家焉以嘗居羊市



易姓爲羊復更爲楊自是始稱楊氏蘇生欽欽生  
全全生瑄瑄生鸞鸞生南陽守應奎是爲君曾王  
父應奎生兩淮運判金爲君王父金生諸生振奇  
爲君父有子三人君其季也八歲向學能自刻苦  
壯爲諸生祭酒歸然長德士大夫家爭延致爲師  
以訓誨其子弟其教悉倣古小學之法而更以惇  
行崇禮相飭厲故被其裁成者後皆爲一時聞人  
君爲人厚重外如其中不作訾訾之言不宿睚眦  
之怨不尚矯激之行不爲郄亦不修人之郄柔心



應世淳風。泐然當申酉之交。盜賊蠡起。君獨處荒  
邨。坦腹高臥。有暴客以劍擊其寢門。其渠叱之曰。  
勿驚善士。此可觀其生平矣。君雖恂恂善下。然不  
輕與人交所交。率文學之士競隆利勢者。足迹不  
至其門。性嗜酒。鄉里宴集。必期盡醉。天真爛然。忘  
其爲吾汝也。君素強少疾。晚而食履視聽不衰。每  
風日清美。必出郭散步。信足輒數里。不覺行之近  
遠。見者皆知爲百歲人。一昔忽病。不數日竟卒。是  
爲康熙辛酉九月五日。距生萬曆庚子十二月二



十日得年八十有二娶沙氏側室劉氏子男二人  
延享諸生娶丁氏昭享娶王氏女子三人適宋鐸  
劉大綸張世俊卒後二十日葬七里河先塋之次  
遵遺戒以圖書彝鼎殉焉所著有葩經講意楊氏  
族譜若干卷族譜成時曾屬余爲其序文未及成  
而君已沒今延享復請余爲君誌羨中之石諡不  
可辭遂序而銘焉或可藉以終吾許劍之義歟銘  
曰

四尺墳八十身居今世古之人我篆銘章額其真



後之來者訊貞珉

有法有情層折多端漣淪盡致歐蘇遺矩也以  
余所目擊者此日文家大手當屬曹汪二君此  
後當有三傑之目矣

高念東先生

每於澹折處生姿烘染有法

汪蛟門



卷之四

七



清故文林郎江西贛州府安遠縣知縣于公

墓誌并銘

康熙二十五年十二月十二日江西贛州府安遠縣知縣于公哭其母楊太孺人以毀卒。卒時距聞訃僅六日也。其卒之又明年十一月朔日葬于飲馬鎮之原。孚子璣持公兄主政君之狀越境來請所以誌其壙者。余與主政以文字相知情好甚篤。且其人純誠質厚言足信重。所述公文學治行皆應銘法用是不敢辭。惟公諱作霖字肖形別字澠

濱世居文登始祖諱皋者徙昌邑遂稱其邑人厥  
後數傳詳見世譜至文學公諱淇處士公諱不順  
贈文林郎安遠縣知縣公諱英則公之三代也楊  
太孺人孕公時夢月墜於庭寤生公公生而警邁  
甫弱冠已與兄沛霖著聲膠序間矣甲午科試沛  
霖名列前茅應進食學官廩爲有力者所奪沛霖  
負屈自理而聲強當事者恚甚加榜焉公屹然而  
人爲兄稱冤并得大杖其兄弟急難不避嶮難如  
此公兄弟抱憤歸閉室不出出其揣摩之業伏而



讀之是秋兄弟遂同舉于鄉當時以爲榮丁酉其  
父贈公病徹夜侍湯藥不懈旣沒執喪能無違禮  
庚戌公兄成進士去公猶困鎖院念母春秋高思  
得一官以養乃棄去公車業隨例試吏部得縣令  
庚申謁選除知安遠縣公逡巡不欲行曰一去四  
千里不遑將母奚官爲楊太孺人曰吾幸健若不  
以時自力報上恩無日矣公不獲已乃行安遠  
古濂江地鄰粵畛閩其俗剛悍號難治公至爲之  
剷剔蠹弊根原窟穴豪髮必盡邑賦舊無定籍皆

計不論田胥史數上下其手人以益困公勾稽會  
較書之版冊凡輕重多寡首尾鱗次不復任胥史  
其弊遂蘇時吳逆未平王師入粵道出安遠舟

車需人甚衆公力請當事其勞費視他邑省殆半  
至里社踐更務使疎數得均故輓運紛紜民不告  
病鄉飲酒禮最古季世有司率用市利居奇貨所  
推擇賓介至有懸梁仰藥或脫身棄妻子逃遁以  
求免者昏姻人倫之始或流爲戲婦惡俗楚撻倒  
懸抱朴所言于今猶烈公皆厲禁之著爲令其它



健鬪終訟溺女掠婦諸弊公隨事誠諭有不從者  
治以柱後惠文民相謂曰公欲以齊魯禮義之俗  
化我也翕然從之署旁舊有廢圃公誅茅成挹青  
之館雖僅庇風雨而種植名花異卉多至數百本  
每當退食鉤簾據几隗俄其間讀書賦詩或延賢  
士大夫觴詠畱連竟日以邑事叢劇他人蚤夜不  
得息公處之超然間暇若區區一邑不足供其施  
設者然則公之才又詎可量哉居安遠六年善政  
爲一路最顓南監司丁君煒鍾君有德先後尉薦

當遷官矣。公念太孺人甚。謀歸省不果。會覃恩。父得贈如公官。母封太孺人。公曰。榮及所生。讀書之事畢矣。遂決計丐歸。當事者惜公才。勉留之。固請乃許。方倣裝而太孺人計音至矣。公哀號自擲。殞絕者數四。退處苦次。旦暮哭不輟聲。家人譬曉百端。終不聽。曰。乞休爲吾母也。母已亡。將安歸。詰朝以書遺主政君曰。戀戀一官。畱滯贛南。不得在。母側侍疾嘗藥。聆永訣之言。親含斂之事。眞天地一罪人也。恐不能生還鄉里矣。竟以不勝喪卒於



官寢公生故明崇禎五年十一月十八日距其卒  
得年五十五娶杜氏封孺人三男子璣候選州同  
知珊瑗皆邑庠生一女子適國子生姜燦孫女三  
皆幼所著安遠縣志十卷入闡記事自記政略各  
一卷詩古文詞若干首藏於家公爲人長髯豐下  
倜儻不羣與之語溫然可親好以談諧翫世或旁  
托廣譬以發其論議至利害事非之際則侃侃言  
之未嘗軟語徇合其居官也屏去繁文力崇實政  
康熙辛酉分校江西鄉試其閱闈牘辨異同論純

駁移日分夜矻矻不休所得八人皆名宿壬戌江  
右第春官者僅劉驪一人卽公所首薦士也部民  
魏甲有妾逋逃公追攝至庭察其色辭有異問之  
果爲盜所掠賣者公遣人齎資斧走千里覓其夫  
鄭於程鄉還之公初至舊令郭君士乾陸君簾已  
卒猶欠官錢各數百緡公皆慨然代償其子弟得  
無遺累公之可記者如此此其所爲應銘法也銘

曰

以仕代耕三釜匪盈及親則榮靡朝靡夕以志以



物寧忍遠親而爲人役。生不適意簪紱可棄。母之  
云。心孔傷不如相將游白雲鄉。於乎爲吏而  
俗以醇爲子。而孝獲信亦足以式後之人。

以古潔之筆敘行能以韵折之筆敘宦蹟於此  
可悟化版腐爲神奇之法。一銘沈鬱頓挫直入

昌黎堂奧矣。

朱岷瞻

東坡文彙

卷五



韓君文潛墓誌并銘

吾邑故多高門鼎貴而家法謹厚敦睦之風至數世不改者惟石埭韓氏爲最其先多衣冠顯人譜  
不能詳可紀者爲封尚寶司司丞公諱守廉守  
廉生文學公諱必大必大生鴻臚寺序班公諱應  
陽應陽生文學公諱鼐休卽世所稱仲元先生也  
砥行績學深於禪悅其子弟蔭藉濡染含章挺生  
則文學文潛君其魁然者也君生而長身偉幹倅  
儻不羣仲元公奇愛之欲使多長者游築精舍數

區羅致勝流遠近師友多聚其家以吾邑論之如  
思石憲石兩劉公夢求王公先叔父侍御公皆一  
時人傑又皆爲仲元公姻戚中表故亦樂就之君  
得獻酬其間相與攷求掌故下上今昔故習懷通  
脫耳目開朗見者皆以爲通儒大人不謂其寄迹  
諸生中也壬午癸未之間所在盜起王曠賊魁陳  
丙將悉銳攻安丘君從數騎蹕百里親抵其壘爲  
言順逆禍福且動以桑梓之情君抗首高論辭氣  
慷慨丙竦聽悅服卽日罷兵甲申李自成破京師



天下大亂君挈家南渡抵留都往往與故人相遇  
故屋廬罷用不謀而具家人如歸焉居期年而返  
初公委質爲夢求先生弟子先生博綜之餘好爲  
小兒醫尤精痘疹以君罷資爲可傳其業遂盡其  
技授之君旣得統緒刻志沈思窮治冥緬成法之  
外又以其意參互用之鄉里友朋爲兒求療者一  
匕乍投輒獲奇驗卽不可爲者亦必預言時日及  
疾病變化之狀不爽累黍以是不復能自閉閤車  
馬冠蓋日集門庭卽邨夫里姥篝鐙扣門無不立

應遇華門圭竇偃僂而入繩牀土銚兒呱呱嘍敗  
絮中便溲狼籍察虛實試寒熱腥臊垢穢未嘗蹙  
頰掩鼻也不獨其技然而其德使人敬歎賢士大  
夫皆納交恐後卽郡邑長吏靡不折節下之長垣  
徐公來爲縣性嚴重兩子患痘瀕危延君調視獲  
安由是相得歡甚每有所扣君不答第言邑中一  
二利便而已其後徐公視學山右以書招君君亦  
不拂其意然僅于道途所歷成詩一冊亾問藁恥  
也少工臨池而最長於擘窠書凡子孫之壽其祖



父搢紳衿章之士欲稱觥公堂者非得君書其屏  
幃不以爲榮也君德益高名日益重御史按部皆  
旌其廬邑中推擇鄉飲大賓君必裒然舉首一再  
赴後君亦自厭之矣性喜邨居而雅好客每軒車  
至止戶屢相錯君開閤延納割蜜脾烹笋萌釣采  
之鮮頤指滿案旣而棊酒雜進譚諧間作喧然若  
陽春之入座隅也餽已偕客散步晞髮于谿橋蘭  
若間客至不能舍去或非其人以一石支剝咏矣  
晚年從祖貞我先生令長興君爲一往汎舟茗溪

采茶顧渚窮湖山之勝而後歸蓋自是不復出游而君亦已老矣君族繁盛伏臘上冢各爲饗祀不相通君曰果爾何以報始而修睦也乃議闔一族公祀之且合餽焉禮成而諸族始一其晚節之爲政于家者如此諸郎成立鄂枌競爽皆能備志物之養君年八十各製綵服僊僊舞剡下四世一堂奉觴爲壽賀者至傾郡邑君大合樂饗讌之自降阼階衣冠肅容賓主雖雖鄉人聚觀讚歎以爲希有也厥後世運隆平家門無恙君滅迹城闔不復



問世事科頭晏起卯酒數杯卽徙倚茆齋勉諸孫  
以學暇則出訪老僧譚說往昔便了一日嘗謂其  
子曰讀書耕田便是樂事不必外求也臥疴兼旬  
視聽猶自不衰醫藥至皆却之家人泣請遺令君  
曰平生自知足又無後慮有何事可言神宇泰定  
條然而逝寔康熙二十七年八月十九日距生萬  
曆三十六年九月十四日得年八十有一卒之八  
十七日葬於邑東五里河之原君諱泓文潛其字  
別字恕齋娶國學生孫公鳴雷女先君廿五年卒

丈夫子三知夢候選縣丞知敬縣學生知忠國學  
生女子子三府學生劉琬李訐歲貢生王元雅其  
婿也孫男九勛助勤劭勛勛孫女七曾孫  
男三曾孫女七所著有西齋雜詠西游小草若干  
卷藏於家君之曾祖爲余祖姑之夫中表之戚世  
篤情好君父文學公日往來余家先君以猶子蓄  
之余與文潛周旋者又餘四十年分誼固不薄矣  
故于文潛之葬諸孤知夢等匍匐請銘余索狀知  
夢曰公爲之尚須狀邪遂卽所知敘而銘之銘曰



欲養是徵攷迺壽欲德是求觀迺有揭其藏可  
詔後

敘事文字易涉版重此獨於家庭日用筆筆寫  
生字字傳神故是誌銘最調

黃俞邵

漢書

卷



馬母高孺人墓誌

并銘

安丘直北爲濰。雖分隸兩郡。而地之相去僅八十里。故多通昏。因若萊。濰高孺人之歸吾邑馬氏也。尤以門第名。德相妃匹云。孺人者前明貢士特舉孝廉諱世孝之子。貴州布政司副使諱桂之孫。贈中憲大夫諱如愚之曾孫。而丙戌舉人候選知縣馬三如先生諱長春之妻也。孺人靜約明惠。故有林下風氣。孝廉公口授以孝經。內則諸書。卽能通曉。大義。父母絕憐愛之。不輕字。年已二十有二矣。

先是孺人之姑適三如從父贊一公每自母家歸時時道孺人賢也會三如失其初妻高孺人太公黽初先生方爲之索婦遂委禽焉旣饋而尊章在堂曾祖姑郭太恭人祖姑辛安人亦皆無恙孺人承事三世備有儀法姑孫太夫人嘗病于盛夏孺人侍疾三月不解衣人稱其孝三如壹意讀書蕩滌情志生不識權量算數事家秉悉委孺人孺人卽朝夕綜理黽勉欣助廳屏內外井井如也三如踏省門上公車孺人皆宿爲治裝行李所須纖悉



畢具三如不知所由辨也。三如好法書名畫及雖  
彝兕敦古陶諸器。孺人雅善鑒別。每有所獲。夫婦  
傳觀。辨析流派。指摘瑕疵。意之所屬。傾橐購取。一  
無吝惜。嘗有持采掇聖教序求售者。倉卒無從得。  
錢孺人以真珠百顆易之。值天氣晴好。必料簡所  
藏。張之素壁。離列几案。摩挲舒卷。欣然忘食。甲申  
之亂。奔遁琅邪。山中所攜金帛盡棄去。惟圖書兩  
篋。躬自負抱。未嘗輒釋。今存定武蘭亭諸帖。猶是  
篋衍舊物也。孺人早出私蓄。爲三如買妾數人。中

年後卽與三如分席異室。從事養生導引之術。然  
向夕必明燈促坐。相對絮語。或援引古昔。或稱說  
時事。酒食祇飭旨蓄。庀具極驩而罷。及各歸寢所。  
漏下已二十刻矣。閨閤之內儼若友朋。是豈人之  
夫婦而已邪。至其仁慈天性。辛巳歲。涪饑竭。困鹿  
煮麋以噉餓者。又收所棄穉子十七人。養于家。歲  
定歸其父母。待臧獲。曲有恩意。卽偃蹇者亦從容  
訓戒。終歲不聞譙訶聲。其于諸姬拊摩愛惜若姊  
姒。然及孺人沒。諸姬皆爭爲服三年之喪。其所以



逮下者可知矣。康熙辛酉三如謝世。孺人一慟而  
病。未幾中風臥牀。帷者浹歲。口不能言。而習甲了  
了。陳衣之前。出所蓄布帛。分散宗。卹孺人。以手爲  
口。其子石麒又能聽于無聲。故得無遺憾焉。孺人  
生以故明萬曆三十二年十一月二日。卒于康熙  
二十三年十二月二十三日。子女昏嫁在三如誌  
中。易乎余與三如居比鄰。以古道相鏃厲。久而彌  
親。文酒流連。過從促數。余嘗買一山水障子。是正  
三如必持示孺人。然後定其真贋。因畱飲齋中。肴

核茗醴。應時而至。此足覘其內政矣。余又嘗遊水  
月禪院。於旛幢間。見孺人繡佛。散紵絲縷。細入毛  
髮。而端嚴靜雅。精彩煥然。饒有管道昇筆意。古稱  
鍼神。殆無以過。以知孺人多能。卽其女紅。亦爲希  
有也。三如捐館舍六年矣。俛仰身世。晚晚無徒。因  
孺人之沒。撫今追昔。有餘恫焉。孺人卒之。又明年  
四月二十五日。石麒麟將啟厥考之藏。而合祔之以  
余爲其先君執友。知其內行獨詳。故來請銘。余方  
欲假斯石以告哀。其忍辭也。雖然。志三如者。新城



王阮亭先生也。昔蘇端明以歐陽文忠志其父以  
司馬文正志其母而溫公猶以爲已之文不敢與  
歐陽公之文同藏也。薄陋如余，迺偃然當王先生  
後，能無載筆而慙惶乎？銘曰：

女德有聞，多起述邇。於惟孺人，何獨不然？委蛇順  
化，七十九年。逸妻壽母，鬱芬播焉。不繫其逢，祇繫  
其賢。掩詩幽竈，久而彌鮮。

婦人文字最難中，拍以其易，俗易套易，平澹無  
味也。夫人女有士行文能一一傳出，便覺異常。

生色  
倪闇公

樂府詩集

卷



庶母董韓兩孺人壙誌 并銘

我先君之捐館舍也先君之側室輔吾母以守節者有二人焉曰董曰韓董孺人分敘爲吾邑舊族世居

東鄙生十有八年而事我先君韓孺人亦自長山

來歸年纔十六耳兩孺人見卽相憐愛若兄弟然

是時先君年逾四十未有子故娶兩孺人乃皆慈

和淑慎內外交慶得人董孺人性凝重喜操作至

則補紉澣濯一任其勞凡酒醴醯醬所擘畫必當

用故先君徵姻合朋之需惟孺人是寄而孺人躬

以上作二  
小傳分敘

自儉薄纖麗之服珍華之飾終其身未嘗一御也。韓孺人好潔成癖單衫白袷雖浣補之跡宛然而整肅若初服至窻戶几榻拂拭瑩淨不染坌埃先君每得名香佳茗必以付之孺人卽焚香瀹茗爲供先君間居亦藉以自適乙酉之冬先君奄忽見背家室漂搖外侮狎至宗黨有肆其憲陵者吾母闔門與語董孺人常相左右吾母語所未及孺人必代申其義侃侃而談彊暴者往往氣沮至遇事莫可孰何三母堦扃塞戶獨與九歲孤兒對燈火



寫來宛然  
一幅金盆  
戲嬰圖也

間情生動  
又整暇

黯然淚下如是者十年。貞稍長漸有子女。兩孺人皆代爲鞠養。節燠寒時。食飲恩勤。備至。遇其疾病。兩孺人迭爲抱持。見兒宛轉痛苦。涕淚常漬衲褥。迨疾平。卽呼乳媪。劍兒倚簷弄之。以爲樂。兒女所需。雖極難得。亦必百道求以應之。平生釵衣盡耗。爲餅餌資。不恤也。兩孺人。啣育諸子女。無不同韓孺人特好蓄玩物。誘之嬉戲。故小兒女每入其室。則嘔啞語笑。倍于他。所以是爲異耳。三十年來。門閭依然。食指如故。吾母與兩孺人。熙熙怡怡。恬于

寫三母精  
神貫注處  
令人感動  
得體

至文至文

堂而安于室。於時亦謂家庭常事。身足爲樂。居此  
何韓孺人。遘疾以沒。吾母相與晨夕者。惟兩孺人。  
忽失其一。反顧堂上。白髮鬢鬢。意思索寞。回環循  
省。能不滋懼。貞之哭。必盡哀。寧僅爲韓孺人也乎。  
吾母自是精神亦衰。丁巳冬。馴致大故。是後每思  
吾母。不得見。見董孺人。如見吾母焉。今孺人又  
張氏之老人。遂盡于此。追憶哭韓孺人時。憂懼交  
併者。又不可得矣。俛仰今昔。若輓轡之轉腹腸。貞  
果何以爲心耶。韓孺人生萬曆庚戌九月二十六



行體

日卒康熙癸丑四月二十七日年六十四以甲寅  
十二月七日葬先父母墓西十步董孺人生萬曆  
丁未正月二十四日卒康熙甲子四月三十日年  
七十八卽以卒之年十月二十三日啟韓孺人之  
窆而窆之嗚呼兩孺人者旣無子女足繫懷抱且  
皆出于單門非有形管之習女師之訓也又生各  
異地非有同氣之戚天性之肖也乃于我張氏爲  
勞人爲節婦爲慈母同心同德有若一人六十年  
來有如一日則我先君之由身而刑于家者又可

知也噫其可不銘銘曰

董居左韓居右死同丘生同牖見先君可無忸勒  
斯銘或不朽

寫兩母忽分忽合行文如羅浮二山因風雨爲  
合離一難也寫兩母而歸重母夫人尤歸重于  
先君如燕燕之詩終以先君之思得情得體二  
難也敘述平生及盛衰存沒之際聲淚俱迸不  
減退之祭姪文三難也斯真天下之至文已

阮亭先生



女孫孟墓輓銘

余長子在辛生十七年而爲之娶婦娶三年而長女生余名之曰孟甫彌月其外王母周孺人卽取養焉孺人爲劉相國女早寡欲得之以慰宗寥故從之其省余及其父母者月財一二至其來也反若客寄者然年十二瘰癧忽生項間百法療之不效旣歷七載氣血盡耗遂成瘵疾以死女生而端莊凝重不妄笑嬉數歲已如成人余每見之輒恨門衰祚薄不獲使斯女爲男子詎意門衰祚薄不

惟賢子孫不易得。卽一好女子。亦不能保其成立也。悲矣。女生康熙庚戌三月十九日。以康熙丁卯五月八日死。死後十有八日。葬於凉水灣頭先伯叔父墓之西北隅。余前此諸殤子女多瘞其地。歲時瞻埽。先壟眼中。又添一殤冢矣。能禁老淚之橫集邪。嗚呼。女年十八。考之檀弓。猶長殤也。然已許字王氏第。未行耳。春秋僖公九年。書伯姬卒。傳曰。許嫁矣。字而笄之。死則以成人之喪治之。雖古今異。便不敢過泥經語而殷人之葬禮。猶可行也。故



稍具喪儀且爲作銘取青州澱泥輓命其父書而  
藏諸壙中用以志余之痛云銘曰  
其來也奚爲亦祇以詒生者之悲

情至之語讀者可裂肺肝舐豪吮墨時應下血  
淚數斗其引典禮處用古而不泥古尤見經術  
之深

周龍客

漢書卷之八

卷之八



文林郎山西平陽府萬泉縣知縣王公行狀  
公姓王氏諱訓字敷彝一字念泉別號悔齋其先  
莫詳所自明永樂中有諱杳者以靖難軍隸籍安  
丘居城東四十里岳山之陽子孫因家焉其後數  
傳爲復厚復厚生周周生一芝一芝生田田生僖  
贈文林郎萬泉縣知縣是爲公父生二子公卽其  
長也少明惠始就外傳所授書一目輒誦年十一  
作文已有動人語鄉先輩曹鑑明先生閱其文驚  
歎曰大王氏者此兒也明年出應童子試卽受知

于邑令姬公郡守柴公一時士大夫咸日屬之矣  
公年十六文林公捐館舍泊喪其祖閔凶迭邁門  
祚衰薄母夫人欲付以家乘而以殯墮先業戒之  
公謝曰兒自有所以承先志者米鹽璫屑非吾事  
也公由是壹意讀書雖生事愈促外侮愈衆而鏃  
礪愈勤嘗自敘其文云苦家貧不能延師也求之  
經史以暢其源流苦地僻無從獲友也取之制義  
以究其指趣又嘗語人曰吾讀書未嘗銳進但風  
雨明晦不使少輟耳聞者以爲實錄年二十五學



使者翁一巖先生奇其文始補郡弟子員又三年而獲旣廩文譽日起爲諸生都講一時名儒多負笈從之順治丙戌秋再舉鄉試遂薦于有司明年成進士謁選得萬泉令萬泉疲邑累案積逋勞若糺絲公悉爲清理時軍興芻秣供億騷然州牒芻牧餼糧或陰有增羨芻邑皆奉命惟謹公獨準其多寡之數應之所省不可訾算其不冝將迎上官重困單赤皆此類也邑俗喜訟諸生不自愛者多鉤連爲黨相與證明每至對簿詆調放恣法不得

行公命設筆札于堂。凡赴質成者必先課其文義。不數日。訟庭肅然。戊子秋。當大比。三晉士臺使者集諸守令。考校之。褒然舉首分校。春秋房得士劉祚繁輩七人。皆名宿公理。萬泉兩載。緩征省刑。興學勸農。已駸駸嚮治矣。己丑六月。姜瓖變起。全晉揭竿應之。萬泉遂失守。而公之才亦竟不獲盡其用。坐是絳吏議。羈棲平陽者二載。辛卯六月。免歸。公喜曰。自今可躬耕養母。長爲逸民矣。乃發藏篋。橫經籍書。寒鈔暑講。不異爲諸生時。公于書無所



不窺而好尤在左國史記及唐宋大家之文闕必  
補譌必正同異必校讐鉤貫箋疏并鉛甲乙若質  
古人于窻戶之間而與之抗論也親申相過有譚  
及執文者公卽喜動眉宇爲之拊析疑義探索要  
眇傾倒輸寫咳唾時拂人頤頰或故實未通必檢  
書相示本末犁然其誨子弟亦如之講貫移時覺  
聽者精神少倦則談諧間作使意興踴躍復申其  
旨務得關節開解冰釋理順而後已吾渠邑乘自  
馬定宇先生創成餘八十年未有續者公蒐訪遺

文網羅掌故使百年文獻闕而復傳讀者稱良史  
焉公復含茹雒閩之學六經四子皆有成書攬撫  
解剝不泥傳注不背本旨聖賢心傳賴以不墜及  
公暮年以世道交喪息交絕游顧與余益親每有  
文成參互是正譏評彈射不肖放過一字郵筒往  
來月必再三間登其堂疎櫺淨几埽地焚香圖史  
井井離列左右見而知爲脩然自好讀書尚志者  
也公清健少疾晚而病肺秋冬之際每患鼻塞遇  
陰暄風寒輒閉匿不出今年偶有怫鬱方在盛夏



前症頓作益以脾疾遂不支矣。閏六月五日過其齋頭公尚衣裳整潔揖余就坐促剋小語無異恆時問其疾曰無生理矣余不覺愴然泣下公曰生卽有死君勿深訝也旋出豫畫後事十三則閱之大約皆曠達解脫一死生齊得喪之言手書辭世數語相示字畫端謹宛然平日戈法兩孫在前指以屬余無甚憐之色別去五日公遽沒嗚呼悽矣公內行淳至事太夫人色養甚備及其以天年終枕塊柩旁血淚漬土棺斂窆窆無不如禮一時有

善居喪之目與其弟恣友憂析箸後財產恆與其  
之痛其早亡視猶子如已出宗族之倚賴者尤衆  
弟某粥田于公旣數年其人已卒矣其子貧不自  
聊公舉產還之不問前直且天性靜退布衣菜茹  
泊然自處經年不登長吏之庭不作居間之刺與  
人處犯而不校卽僕隸之微亦未嘗有失色其于  
制舉之業最精生當時文靡濫之秋公獨汲古振  
奇以先輩大家爲法自明初以迄今茲三百年來  
名篇傑作皆能舉其大凡非如世之傭耳剽目苟



然而已也生平不飲酒不事嬉戲每當州閭喧阗之會少年徵逐之場他人所流連忘返者公必奉身而退或問之曰世所謂不幸者三身咸歷之心傷目慘隨在皆然敢與安常處順者同其逸樂哉其語意良足悲矣公生于萬曆四十二年正月二十六日辰時卒于康熙二十二年閏六月十日寅時得年七十娶張氏封孺人暨娶潘氏子男一人士魯諸生女子二人適李玉璽劉仁雨孫男二人廣享廣基俱諸生曾孫男一人隘宗曾孫女三人

所著有論語日知編二卷學庸思辨錄二卷七篇  
指略七卷詩讀七卷續安丘志二十五卷悔齋全  
集八卷公沒之歲其孫廣學等將於十月六日葬  
公甘棠邨之原而來請狀于余謝不敏則曰治命  
也當先君易簀語不肖曰生平好友惟曹與張其  
以實菴子表吾墓而以杞園子狀吾行吾目瞑矣  
亡友之言不敢負謹狀

予旣用敷彝遺命爲之作狀文成于癸亥九月  
朔日已刻版本傳布矣葬逾三旬仲冬十一日



之夜夢其過予褻服慘容予延入勉厚堂東室  
皆據案南嚮敷彝坐予之左謝爲作狀予愧其  
漏落敷彝曰極爲詳盡夢中予知其已死因與  
敘述平生各作數百許語言及死生異路永從  
此辭遂相向痛哭而寤予嘗讀鍾伯敬紀陳白  
雲魏太易事頗類此才鬼有靈古今一致慨歎  
之餘乃援筆而識狀後

自記

作狀最難議論波折俱無所用以其別于誌銘  
也此篇法嚴而意密描寫如生

汪蛟門

沙丘志

三



先祖文林府君行狀上施愚山先生

嗚呼。先祖考之沒也。已垂百年。卽其改葬敖山。亦  
六十年于今矣。而墓上片石缺焉。無文。不孝之戾。  
其將何逃。然念我諸父。自束髮知名。厥後鄉行宦。  
業粗亦見許于清議。所交一時之鴻儒。峻生當不  
爲少矣。而敖山之阡。乃尚有石。無辭。則我先人之  
意。不槩可想。見歟。意必其人之賢。可託之以不朽。  
我祖考者也。又必其文之工。可託之以不朽。我祖  
考者也。然未能兼獲而儷。至此墓上片石。所以終

缺焉。無文也。若今天下秉顏閔之德。擅左馬之才。所謂一字之褒。重于華袞者。非夫子而誰。小子貞鄙猥無似。幸獲追隨。留丈玷弟子之籍。是皆憑藉先世之寵靈。我祖考之潛德。隱行將復有聞于奕禩也。故不避譴責。扶服門牆。銜哀上請。伏惟憐察焉。先祖諱民。感字爾孚。別號霖海。其先蓋淮安山陽人。明初處士公諱友。徙青州之安丘家焉。數世皆力田。孝弟至大父。將仕公諱澄。始以明經主武安簿。父東津公諱守蒙。諸生母馬孺人先祖生而



端方嚴潔雖隸諸生不屑事俗儒章句惟以綱常  
名教爲已任見人不善若將及身憤時自厲卽矯  
枉或過其正弗顧也中年無子吾祖母王孺人爲  
買一妾有姝色于歸之日淚痕滿頰問故乃知出  
自名族家人徇利給之使來耳先祖惻然不索其  
直立遣之歸女抵舍對去使稽首言張公長者當  
獲三男之報後果相符衆皆于此觀天咫焉先祖  
以理自信絕不知有鬼神機祥事嘗營樓于五里  
河別墅築基之前夜夢一老嫗來告曰庇公宇下

久今當見遂待兒輩衣服備而遷我必有以相報  
明日啟土見蛇処延地中以千百計先祖曰是豈  
疇昔之入夢者乎竟移寘中野先祖以時俗過奢  
力崇儉樸一摺扇用之輒數年或病其谿刻先祖  
曰福當如是惜也晚年遺戒斂以柳棺送終之具  
皆勿令踰制既病且革出橐裝千金向從子孝廉  
君書紳曰平生之藏盡矣嫖嫖諸孤豈易守此畀  
汝待其成付之不則自享之耳孝廉君唯唯置食  
器中舁去人無知者及我諸父漸長孝廉君大會



賓客復還原金使非實有以感其心亦何能令人  
不忍負之于沒世邪卽此而先祖之爲人亦可槩  
見矣生於嘉靖七年九月二十六日寅時以萬曆  
十五年四月四日申時卒爲春秋者六十始葬十  
二固祖塋之域後以其地不墨食天啟七年十月  
朔日乃復改葬敖山又八年以吾叔父侍御公司  
理考滿得贈文林郎直隸大名府推官兩娶于王  
并贈孺人生三子長嗣倫萬曆壬子舉人娶曹氏  
次則貞之先人諱繼倫天啟丁卯貢士娶吾母許

氏孔氏次緒倫崇禎辛未進士湖廣道監察御史  
娶王氏封孺人俱次配王孺人出女一人適諸生  
馬爾駿元配王孺人出孫男二喜聞諸生早卒孝  
廉公出貞康熙壬子拔貢生候補翰林院孔目吾  
父明經公出孫女七適諸生馬道弘者孝廉公出  
適諸生馬道長李定育王憲祖王翰臣國子生高  
櫛周恆生者吾父明經公出曾孫男三在辛在戊  
在乙曾孫女四俱貞出當先祖之易簀也吾伯父  
年十二吾父僅三歲叔父時方在娠先祖顧謂祖



妣王孺人曰育必男也且大吾門矣其言畢驗究  
莫知其前知以何術也嗚呼我祖之生平既不獲  
盡傳所傳僅此一二事又將沈泯而無聞此小子  
貞所以夙夜愁痛汲汲圖之于夫子也伏望錫以  
鴻文勒諸堅珉用示永永我祖考乃終不朽我諸  
父當佩德于九原小子貞之感恩懷報又寧有窮  
極哉謹狀

慘澹經營全在起手一段中間敘次安雅後面  
收拾緊完古文正斥近在吾黨可敬也夫○前

段置之八大家集中亦稱得意文字然非淡於  
古者不能作亦不能知

馬三如



先考明經府君行述

先府君行述成于康熙壬子。爾日以有所諱故於  
府君生平多未獲盡其辭。嗚呼。昧陋如真。卽直書  
其事。尚懼萎弱疎鹵。無所肖似。參以曲筆。又何足  
言。夫紀述行事。若寫貌然。善畫者貴得其精神之  
所在。程子有云。一豪髮不似吾親。何以親名之。每  
誦斯語。如負芒刺焉。因再序次如左。府君諱繼倫。  
字漢荀。別字學海。晚號雪松老人。世爲淮陰著族。  
始祖處士公諱友明。初北徙。遂爲安丘人。曾祖登。

仕公諱澄以貢士主武安簿祖東津公諱守蒙諸  
生考霖海公諱民感諸生以子侍御公貴贈文林  
郎種學績行還妾之諡邑人至今稱之有三子伯  
諱嗣倫萬曆壬子舉人季諱緒倫崇禎辛未進士  
官御史其仲則府君也生三年而文林公棄養稍  
長母王太孺人爲擇名傳傳焉太孺人督諸子嚴  
其有先後游膠庠者皆分席異膳以別之府君兄  
弟卽恪奉母訓爭自砥厲同以文行名于時齊魯  
號爲三張府君負異稟讀書數行俱下手鈔一過



終身不忘十四補邑諸生十八廩于官天啟丁卯  
以貢入太學崇禎庚午中山東鄉試副榜旋遇恩  
例明經謁選人當得縣令或勸駕府君曰仕不由  
科第卽矯奮何益竟不就府君明敏勁果事至能  
立斷且慷慨好施勇于爲人間里咸被其惠卽遠  
方之人以急難來告苟事出不辜無不傾身營救  
其于義利之畛則判若斷山蓋其天性也府君中  
年吾世父病沒叔父游宦當戶酬對者唯一身而  
已府君揮霍肆應莫不霑接是時府君德益高名

益盛。交知日益附。鄰郡良士大夫靡不縞紵贈餽。邑有大計。縣大夫不能可否者。亦必就府君咨問。其興革利害物情。時趣爲之抵掌論說。若燭照數計。無秋毫疑滯。而其所爲培植務在單赤。絕不及私。壬午兵躪二東。陷城殺長吏。將徧安丘邑人兇懼。縣令惴恐。各欲逃去。府君聞知。大驚。夜扣縣門直抵齋閤。詳告以去。畱利害令大悟。相與坐語達旦。集諸父兄子弟於城頭。府君卽以告。令者告之衆。亦悟。于是上下始有固志。治城塹。修器械。皆捐



資爲衆先而所以防備捍禦者又多出府君計策城遂得全。明社旣屋羣盜四合無長吏爲之統攝邑中又大亂。府君義不可辭復出而應父兄子弟之請。府君任事首議養兵得千二百人與邑人合詞上請。擇鄉人李景隆者。假名偏裨以爲之率。日夜訓練。隱然成一方鎮。賊婁聚衆來攻皆于城下戰走之。又嚴斥埃。勤偵探。靖境內之竊發者。寇焰得以少息。又念揭竿者衆不忍盡殲。設方略以招徠之。頰首就撫者數千人。自是而人始望更生矣。

兵戈之餘流。亡相屬。府君收婦子之仳離者。稟于家。亂平。詢其族姓里居。各遣人護歸之。敵旣徙營。所遺輜重。多爲人獲。壬午冬。有遺牛十四。羊二百。于府君別業者。立白有司。用以享士。毛髮不以自染。會大比。邑士多貧。不能赴鎖闥者。府君爲計道里。籌時日。各與資糧。得以竣事。嘗立于門。見有欲粥女以償官錢者。出數金。讎其負女。得不粥。又遠賈糴粟。邑中將行發視。半沙礫。知爲奸民所詒。然莫能誰何之。府君爲代言於令。直其屈賈。遂無



所入每歲冬出錢穀振饑人宗族親故待而舉火者。亾慮數十家。佗如藥病棺殮泉粟窮獨卒需。它求趣具。曲應不問識與不識也。且慈隱天性。其御臧獲以愛克威。下而畜養之。微有自斃者。亦準古帷蓋義瘞之。甲申秋。偶客青州。遭趙寇之變。微服而逸。時羅戈如林。無過問者。人以爲長者。報云。性喜交游。居恒宴客。日必滿數十人。士之懷一才抱一藝來游邑中者。皆以府君爲歸。府君必爲之。胝舘致殮。悉厭其所欲而去。府君虛懷善下。田安小

孺皆接以禮。獨不能爲權貴屈。夔郡司理某公爲  
吾叔父辛未同年生。按部安丘。張甚。府君往拜其  
出。稍遲。府君謂之曰。以吾弟之故。循例相通。非有  
求于公也。司理改容謝。府君尤篤內行。文林公蚤  
世事王太孺人。以孝聞。與兄弟恣友愛。孝廉公病  
藥餌必親。旣沒。厚裝嫁其孤女。供養丘嫂。曹二十  
年。無愆容。及侍御公卒。傷悼益甚。徐念其無後。謂  
天憐吾家。幸畱一綫息。忍令吾弟無所托血食乎。  
手題木主。以貞主祀。署名其旁。撫棺告曰。吾弟有



子矣。歲時腰臘。或可相依也。侍御公之按鹺兩淮也。巨商某有罪。應抵攜重資走千里。乞一言緩其獄。府君艷然曰。方以執法勉吾弟。顧翫其法邪。戒門以絕其兄弟。間以義相成。又如此。生平不媚乾竺。不信巫覡。不事蒲博。不教歌舞。尤不喜閨房識字。及僮僕鮮衣惡習。家法故整肅。男女十歲以上。卽嚴內外之防。尼師道媼無敢迹其闕者。早歲營築。頗喜閎麗。尋亦厭之。紙窗土壁。埽地焚香。意泊如也。嘗取宣和博古圖。命工盡繪于室。曰。吾欲食。

息與彝鼎俱也。室中經史外止蓄一琴。遇意有怫鬱鼓一再行。冰釋矣。莫年天地崩坼。骨肉凋殘。憂懣無聊。遂大發藏書。流觀送日。以故博洽淹貫。浩無津涯。雖醫卜之學亦窮其奧。有奇驗焉。酷者臨池得赫蹏。必從衡書之。盡黑乃已。久之數簏皆滿。初耽蘇米。晚更得二王法。與人尺牘皆藏弄爲榮。善寫墨竹。興酣落筆直攄胸臆。風枝雪幹磊砢扶疏。人比之文石室。云府君年雖逾耆。髮容未改。鐙下作書。疎行細字。一一精好。見者皆羨其神明之。



不衰。迺自燕游歸。甫及旬。忽嬰痰疾。四日而終。天  
乎痛哉。府君生萬曆乙酉六月十二日戌時。卒順  
治乙酉十月二十八日午時。年六十一。葬於邑東  
五里河之原則丁亥五月二十日也。娶吾母許氏  
濰縣河間縣知縣公進女。前府君十年卒。又娶吾  
母孔氏。壽光處士公東周女。後府君三十二年卒。  
一男子卽貞壬子選貢生。候補翰林院孔目。吾母  
孔氏出娶同邑李氏六女子。長適同邑庠生馬道  
長。次適同邑廩生李定育。皆先府君卒。三適同邑

廩生王憲祖四適同邑庠生王翰臣皆吾母許氏  
出五適益都太學生高樞六適同邑周恆生皆庶  
母李氏出孫男三長在辛丙寅選貢生娶同邑周  
氏次在戊娶同邑劉氏次在乙孫女四長適同邑  
庠生馬士修次適同邑太學生曹需次字同邑劉  
亶茂次適同邑庠生曹澈曾孫男四敬輿扶輿在  
辛出壯輿幼輿在戊出曾孫女四皆在辛出伏念  
先府君篤綱常重名節讀書懷古蘊義生風有過  
人之才而數奇不遇終老田間僅令人從設施于



鄉邦者。窺其經濟之萬一。昔賢所稱才足以任重。  
責成。謀足以折衝經遠。而不見知於人。不獲用于  
時者。非府君其誰謂邪。所恨貞九歲孤露。白首無  
成。人子之義。終不能有以自見矣。及欲追述平生  
用傳永久。乃采掇四十餘年。迄不得其要領。間拾  
一二遺事。辭又不足以達之。卽其抱愧于箕裘。寔  
爲負誓于天地。仰惟

大人先生。與前狀互觀于貞所能言者。以推其所  
不能言者。庶可得先府君梗槩矣。康熙戊辰臘日。

不肖孤貞泣血謹述

懽惻婉至仁人孝子之情溢于言表至其敘事  
井然不亂下字鍊句皆蒼古提挈關鎖悉謹嚴  
有法度非寢食史漢而得其神理者未許道隻

字

曹升六



先妣許孺人事略

先妣許孺人世家萊州之濰縣外大父諱進封文林郎河間縣知縣外大母王孺人先妣其最幼女生而淑茂端凝父母愛之難其偶先考明經府君當授室先祖妣聞孺人之賢遣媒以行先府君時在弱齡才名已噪齊魯間故河間公悅而諾之以遠道爲嫌孺人來嬪年甫十六事先祖妣卽克盡婦道大有聞於六親先府君與諸父析箸之初家徒四壁立孺人力崇約素備極勞勩府君讀書

外舍率數月不歸而憂不及屢屢則惟孺人是賴  
孺人結褵數年四舉皆女遂亟勸府君置姬媵每  
當祠竈夕府君必述終歲所行爲文告神以祈子  
孺人亦伏地涕泗謂余卽不德張氏宗祧不應由  
此而斬儻別有所生皆吾子也敢冀其必自己出  
乎是後所置諸姬果屢得男孺人提攜憐愛不啻  
如其所自腹或有夭殤孺人悲悼痛惜亦不啻如  
其所自腹較之恆情過分吾汝者斯以懸矣孺人  
之握家乘也惟以莊靜自持不尚煩苛而內外肅



然至其慈祥寔本天性人以急難相告靡不加意  
軫卹見戚黨中有鞭捶女奴過當者立脫簪珥贖  
之爲擇良配值凶年里媪求糠粃自活孺人迺振  
以嘉穀使無失所此猶細故也至吾祖妣旣沒孺  
人慕之終身每一念及卽潛然淚下府君性嚴正  
當有所怒必委曲喻解待其冰釋而後已說者謂  
府君動無過舉得之內助者爲多是又仁孝明達  
之德作則閨門者矣吾李氏妹孺人夢女也病瘵  
甚厲孺人昕夕與居亦濡染成瘵崇禎丙子二月

李氏姊沒孺人痛絕竟不復有起色以是年十一月四日辰時卒距生萬曆乙酉九月十九日亥時得壽五十有二丁丑四月二十八日葬於城東五里河之原子女婚嫁詳先府君狀中不肖孤貞泣血謹述

慎紀伯紫



先妣孔孺人行述

嗚呼不孝貞又爲無母之人矣念不孝生九年而先嚴見背家難大作日日在死法中賴吾母撫育教誨得有今日其艱難荼苦百倍恆情數年以來稍得休息而吾母忽遘虐疾以不起矣不孝雖號慕殞絕究無裨於逝者因亟圖爲不朽計而一時之宗黨姻戚又爭訊母事狀將製爲哀誄之文以光地下遂濡淚吮毫略述懿行以備采擇但當此五內橫裂昏迷瞶亂之時其何能詳伏惟

大人先生哀憐之吾母姓孔氏系本曲阜後有徙  
青州之壽光者遂稱其邑人高祖登仕公諱膠字  
德固贈國子監學正以名德重於時制詞所謂讀  
書履善者是已曾祖別駕公諱鼎以明經歷仕至  
陝西鳳翔府通判祖相禮公諱夏衡府引禮舍人  
父處士公諱東周母劉氏吾母其長女也先考明  
經府君當盛年難子乃求淑媛爲室男計聞吾母  
賢而委禽焉丁卯來歸柔順開敏能蒞事先府君  
處諸娣姒姊妹人人得其驩無勃谿陵諍者尤長



女紅組紉就業竟日不出閤門卽家人罕得一見也久之不孕乃稽首佛前焚香鐙自誓以祈有子每於歲之王正月之朔望必茹素繙經立程課誦至丁丑而育不孝貞是後奉佛益虔蓋四十年一日矣庶母李氏沒遺兩女子長八歲次三歲先府君語吾母曰兩子可念唯汝能撫之吾母旣受命爲之視苛痒推燥溼以至遣嫁之資裝飾序之餽遺一絲一縷靡不竭盡心血吾母一生所寄僅不孝一人而吾母之愛兩妹寔數倍於不孝如世所

云不異已出者似未足擬吾母心事也乙酉吾母年三十六先府君捐館舍吾母哀毀幾絕以有不孝在復勉爲進食斯時也先叔父侍御公厭世未久復遭先府君之喪內無期功強近之親外有虎狼窺伺之懼吾母以隻身獨手攜九歲孤兒躑距其間不問而知其難矣先府君甫斂有內戚某者紈袴子也挾父兄之勢武斷里中視不孝母子爲奇貨責賄之使交織道路嘗記其索一屏風吾母以先府君手澤所存堅不肯與卽呼詈而至抨擊



之聲遠震鄰里。奴子數人皆羅拜乞哀。無不飽其  
老拳者。時夜已半。舉室張皇。面無人色。啟戶仰視。  
黑雲壓屋。一鐙在明滅間。寡母孤兒相對飲泣。至  
今回思。猶慘然心目中也。又有大腹豪某。亦屬內  
戚。視不孝園中有嘉樹。欲移植其庭中。吾母親往  
止之。弗聽。乃叱之曰。鼠子敢爾。以吾家無人。故不  
知有老婦在耶。五步之內。將以頸血濺汝矣。其人  
大懼。復以樹植原處焉。吾母曰。吾之所惜。寧惟一  
樹。良以漸不可長耳。立命剪伐而歸。於時又有族

子數人託名治喪。雄踞靈幃之前。矯尾厲角。勢將噬人。吾母處以鎮靜。第腆潔其飲食。溫和其體貌。使無卻可伺而已。久之。其謀愈深。其計益毒。流傳洵懼。一日。數驚吾母。乃遣人告吾外舅養徵李先。生曰。保家室。存遺孤。以見夫子於地下。此未亾人初志也。今若此。揆其理勢。非斃此三尺孤。而矯虔其產。不止也。是獨有散之一法。在乃對几筵。徧告戚黨。大集宗人。傾先府君遺橐千餘金。畀之。更以某田付某支。以某宅與某子。一日之內。資產去十



之七八。所存唯瘠田數頃。老屋數椽而已。先府君有出貸錢數百緡。至是悉取其券書燒之。且榜諸門。令逋負者自安。乃撫不孝而泣曰。吾今始貽汝以安矣。自時厥後。家既貧落。甌亦稍息。乃遣不孝就外傳。日舉先德及鄉里故實。可爲勸鑒者。以相訓迪。內外家政亦漸就條理。前諸宗人多不自愛。雖獲厚資。而博奕飲酒。緣手蕩盡。間有以爭財之故。同室操戈。由之殞命者。吾母憐其困窮。歲時仍周卹之。迄於今。不孝與諸宗人處。必推心置腹而

不敢略存疑貳者。遵吾母之教也。已丑爲不孝娶婦。是歲不孝補博士弟子員。而新婦又頗能承順。吾母意諸孫男女亦次第生。昊天已威。家門無恙。吾母從此稍稍解顏矣。母體素健。尤好力作。入夜篝鐙。必集羣嫗紡績一室。以身先之。至漏下二十刻不止。絡緯聲常與銅籤相應。不孝恐其過勞。幾諫隨之而不能從。亦其素懷微尚然耳。吾母操家秉三十餘年。內外臧獲數百指。不須不孝問其寒燠。而望秋挾纊者。吾母之恩也。歲在戊申。值地震。



之變百堵皆傾不孝被壓以死信宿而蘇吾母痛  
悼驚悸雖未示疾而肌膚不實精神頓減矣甲寅  
邑有小警人心皇皇不孝奉母辟地郡城是歲覺  
吾母性情語言多失常度不孝與婦心竊異之而  
未敢言不意長往之兆卽見於此也嗚呼痛哉丙  
辰五月不孝遊京師吾母病痢甚劇旋小愈不孝  
七月歸來吾母搯不孝臂曰幾不獲與汝相見吾  
母泣不孝泣家人環侍者皆泣。何病起蓋自是  
需杖矣。丁巳春不孝再遊京師雖日與士大夫相

周旋以母體未健心常惴惴未逾月卽趣俶裝都門諸君子之愛不孝者多以遄歸爲恨而不知其不可畱也四月初抵里門吾母晨夕不孝必與婦偕往侍食且呼諸孫男女環繞左右吾母亦欣然爲加匕箸然病益增形神日瘁非兩人扶掖不能成行至七月十四日而委頓牀蓐間矣吾母自感痢以來延醫診視多謂所患者不在瀉痢而在風痰非以丸藥豫治之不可不孝稔知吾母艱於下咽故皆和爲湯液以進是後醫方數易而效與不



效常相半十二月十九日爲吾母設輓之辰不孝  
率諸孫拜於牀下見母沈迷轉甚悲不自勝雙淚  
承眵吞聲而出不孝雖心知其不起以前此乍劇  
乍減者數矣或尚可少延數時不意其越三日卽  
倏然長逝也嗚呼痛哉吾母賢明仁厚人無少長  
貴賤接之一以溫和卽與田婦里嫗語如惟恐傷  
之其待子孫諸婦亦然尤不忍虐使其下不孝自  
侍郤前從未見以鞭朴加人晚年坐臥一小樓婢  
子有偃蹇者聞母訶責卽避其梯下吾母操杖擊

梯婢子必不肯出。母亦釋杖。怡然旋忘其過矣。天性儉約。衣履樸素。食不重珍。而最惡積財。有一錢必散之親黨。外家失業相依者。皆廩於別墅。溫飽終身。吾王氏姊故邑世家。未幾中落。貧不自聊。吾母分宅與居。醯醬以日給。薪米以月給。縣帛以歲給。垂三十年不懈。吾高氏妹遠住郡城。不孝每以甘旨進。吾母不忍獨嘗。必蓄以餉之。陳衣之久。不孝輩料檢牀頭。見珍果盈筐。縑絨甚祕。問之女奴。則病中手裹。畱待吾妹者。不覺慟哭。於是歎吾母。



之慈爲不可及也。已說者謂仁者必壽無不以耄  
耄相期孰意年未稱老遽嬰篤疾輾轉牀第備諸  
痛苦五月弗瘳而竟罹此大故耶天平豈真不可  
問乎嗚呼痛哉吾母之沒旣已逾旬不孝彷徨寢  
門如聞呻吟之聲而吾母不可復作矣貞亦人子  
將何以爲心耶嗚呼痛哉伏念吾母年十八而歸  
我先府君又十年而生不孝貞又八年而先府君  
卽世又三十二年而終于內寢其前此者無論已  
自乙酉以來羣小狙伺諸蠹叢生真如芬絲之不

可理如橫流之不可制如壞屋漏舟之不可楮柱  
吾母以倥弱之身遭逢其際能審擇于旤福利害  
之關千金可揮一言立決卒之全孤遠害弘濟艱  
難吾母之報稱我先君者亦已足矣嗚呼不孝之  
所述僅其可見者耳至若大厦忽傾漂搖一室其  
爲肘腋之彌縫家庭之調劑不堪對人言不忍出  
諸口者又不知其凡幾矣不孝嘗讀史傳所載賢  
母代不乏人然他人之所爭者在盛衰而吾母之  
所爭者在性命他人之所全者在資業而吾母之



所全者在宗祊。不知良史操觚當置吾母何等也。吾母生於萬曆三十八年十二月十九日寅時卒於康熙十六年十二月二十二日子時享年六十有八子孫昏嫁詳先府君狀中嗚呼吾母已矣鼎烹之養旣已闕於生前華袞之褒冀少酬於身後惟祈

仁人長者鑒此幽貞憐其苦節大奮董狐之筆俯徇易鳥之私垂於簡編勒諸琬琰俾老母卽安下地斯小子永戴高天不勝激切哀號之至孤哀子

貞泣血稽顙謹述

身所親歷如印在心故描畫得有聲有淚○太  
夫人操行奇偉而杞園之文亦稱

宋旣庭



御史中丞曹公哀辭

并序

康熙十九年十二月初五日填撫貴州御史中丞  
曹公伏節雲南先是十二年十二月吳逆亂作大  
帥李本浚從之以書招公降且約禽制府甘公及  
薩党二使者以獻吳逆公得書具疏遣使星馳告  
變護二使者還朝阨塞要害得以慎固封守而  
虎狼蛇豕不至逞志長驅者此疏之力也。何督  
標兵變貴陽不守陷沒賊中者七年公陰養死士  
司間抵隙以期報國庚申之夏蠟丸赴闕約

會內應事機不密爲賊所圖遂就義于雲南之雙  
塢寺嗚呼哀哉公旣死行間將士見逆黨殘害衣  
冠翦除良善若斯之毒又感公烈節無不慷慨激  
昂以除兇雪恥爲已任者故卒至渠帥齎醢妻孥  
刳斮醜類殄滅無遺然去公之死尚未浹歲公亦  
可無憾于三泉矣天下旣定公之死事報聞于  
朝部檄所司亟歸公喪經行郡縣吏民皆擁道泣  
拜如喪私親壬戌八月八日始抵里門舉邑之薦  
紳士大夫及耆老子弟相攜出迎號哭之聲震天



地此豈無以致之。而然歟。公爲吾邑右族。代有顯者。自高曾以來。其稱兄弟進士者三世矣。至公與其兄實菴。皆少負奇穎。嘗爲先君子所歎異。余之識公。在其鄉舉後。而其年則甫舞象也。是後余與長公締結姻好。公去而登進士侍講。幄參大藩。客有來自公所者。每道問訊。余則引分自遠。公亦未嘗責也。及公入爲納言。尋遷廷尉。未幾而休沐里居。與余情好益篤。每相過從。簾閣焚香。清譚移日。頓忘賓主。曾以長歌贈余。獎飾逾涯。其所以

期于余者深。故不自知其言之失也。甲辰夏再入  
爲廷尉。已而佐春官。又晉少宰。旋以少司空開府  
黔南矣。當其行也。驅車過里。飲余勉厚堂中。握手  
言歡。酒酣。謂余曰。此行勿爲久別計。吾年及四十。  
卽返初服。子當遲我于東阡北陌間也。爾時以公  
方盛年。何能決計引退。故領之而未敢諾。何意癸  
丑之冬。公年僅三十有九。變起非常。不得遂懸車  
之願。幽憂七載而竟及于禍。邪。嗚呼哀哉。公清峻  
立。朝方嚴。行已至梯。接寒峻。交歡友朋。則摧亢。



爲和人人得滿意去。若其與余少同里閭。長聯姻  
婭。而志孚道合。又有出于尋常親串之外者。公喪  
北來。余逆于汶水之陽。卽公持節撫黔。供張祖道  
處也。惟見雙旌前指。兩孤捧柩。河流有聲。木葉亂  
下。雖欲勿哭。何能不哭也。因作辭以寄余哀。且用  
以解實菴之痛。若其世系行業。他日史氏傳忠義  
者。書之必詳。當無俟余之絮絮矣。公諱申吉。字澹  
餘。云其辭曰。

世廟中年兮。國運昌隆。應期維公兮。才具駿雄。

亾書十篋兮羅于心。胷弱冠登朝兮簡在宸  
衷。褒席金華兮儔莫與同。出領節鉞兮三楚天中。  
丰裁凜然兮淵深嶽崇。入爲納言兮達帝之聰。  
樹位棘寺兮斷罟投弓。亭疑閱實兮裁決如風。  
帝嘉乃德兮峻陟南宮。典朕三禮兮劍佩雍容。爰  
佐太宰兮簡要清通。百僚師師兮時亮天工。海內  
企踵兮望其登庸。忽承帝命兮填撫蠻戎。瘡痍  
立起兮慰此哀鴻。何意逆孽兮墮我崇墉。虎豹當  
關兮萬里孤蹤。蠟書上變兮夜達九重。傳檄邊



微兮丸泥可封拘幽七載兮憂心忡忡籲天叫號  
兮如霆撞鐘圖賊不成兮罹此鞠凶從容就義兮  
其樂融融左右聖祖兮浩氣如虹二子同收兮  
天地爲籠覆巢完卵兮竟全厥宗公德遠茫兮在  
後之侗疇謂天醉兮視之夢夢總帷在望兮杖屨  
奚從抒辭告哀兮徒愧雕蟲

序中已詳生平本末使他人爲其辭必思變法  
以避之此乃重寫一過而能令一字不犯以序  
之所述者交情辭之所述者行履也那不歎爲

獨絕杜于皇

謝文豪

三



三如馬公誄

并序

維康熙二十年十一月二十五日三如馬公卒。余具朋友之服。哭公于寢。既去而悲彌甚。余蓋與公比屋而居。聞遠近戚族來弔。酹者靡不有慟。及歷三旬。哀聲猶不絕于耳。然後知公固有可哭者在。余之悲公。非昵也。次月二十日。鄉士大夫又將會哭。匱前且欲排纘。懿行載諸素旂。用彰盛美。而以其辭屬之于余。遂作誄曰。

粵稽馬姓。肇望扶風。渠丘占籍。爰有四公。順祥孝。

友爲時君宗。勤勤積累。譬阜將崇。經術蔚起。五世  
其昌。或綰墨綬。或沐龍章。彼蒼篤祐。餘澤未央。厚  
集中丞。發爲國光。中丞二子。繡被朱纓。容臺典禮。  
青瑣騰聲。後先輝映。父子同升。兩枝之享。濟濟科  
名。猗歟儀部。寔爲公祖。文苑事功。孰敢與伍。父曰  
司訓。文章與府。皋比榆山。冠裳踵武。公生淵敏。休  
問早張。六經鐘鼓。四部笙簧。卒瘞手口。棐几蒿牀。  
虎僕所列。溷厠門牆。時維丙戌。公試棘闈。鹿鳴歌  
起。牙角歛飛。曲江一席。舍公安歸。士林引睇。紫閣



黃扉疇意南宮九上不收利失于將足蹶驛驕人  
爲扼掣不勝怨尤公獨居易任運優游懷抱古今  
魚魚雅雅緇帙縹囊可汗牛馬徙倚經行一編時  
把陋彼魏武讀書春夏所最祕惜殘楮敗紈鍾王  
行草顧陸雲巒偶獲名蹟賓從傳觀摩挲歎賞不  
遑加餐園名甘露齋號筆花煙籬曲護雨幌斜遮  
清琴明燭紗香乳茶何以娛耳兩部鳴蛙二仲過  
從鮭菜羅案屏後歌聲時出酒半脆管低迷哀絲  
續斷主客相忘歡然達旦譚鋒犀利不置雌黃紫

芝睂宇。孝先腹腸。汲引後進。每折輩行。四序皆暖。  
九曜絕霜。公之篤厚。溢于顏色。蒙輯之施。尤可觀。  
德里有昏喪。中心憫惻。厚以賻襚。資以衣飾。密城  
孫子。公之諸舅。內弟高君。來自平壽。公綰旅人代。  
爲結茆。時其緩急。相其無有。匪直三族。待澤方殷。  
賑窮給孤。惠洽鄉鄰。何以頌公。處義敦仁。何以祝  
公。迓休無垠。我思公才。羅羅清疎。場屋之業。富于  
三餘。奈何壬辰。僅中副車。擬魁辛丑。竟成子虛。跌  
宕詞壇。翱翔書圃。戶競蛟騰。人誇鳳吐。溢爲篇章。



球琳珪珎方彼杜韓孰今孰古

今上御極周諮治道丁巳之秋爰下

綸誥繡虎

雕龍在在入告郡邑同聲推公博奧文書紛縕乃  
竟不報晚逐多士試于豕宰雖列前茅壯心已怠  
州縣勞人匪好所在把酒看山澆其塊磊維公莫  
年勤加頤養松朮服食呼吸存想望若神仙幅巾  
鶴氅尋壑經丘未嘗杖杖方冀百年日引月長驚  
傳負疴我問于牀執手依依情話琅琅誰期信宿  
遽游帝鄉嗚呼哀哉長庚墜天龍蛇起陸國失典

型鄉無良淑。少長崩奔。惟恐不速。拊膺憑棺。噉然  
一哭。嗚呼哀哉。七十有六。不可謂天。況也令子。足  
以承祧。驂螭駕蚪。雲海飄飄。善善如此。天聽豈高。  
嗚呼哀哉。蔡碑有道。顏譚淵明。傷心千古。惟有死  
生。素旃在望。鐙火青熒。陳辭抒痛。如鳥悲鳴。嗚呼  
哀哉。

序則矜嚴。誄則典雅。

汪蛟門



新城東亭王公誄 并序

康熙二十年九月二日候選中行評博進士新城東亭王公以疾卒于京師其弟國子祭酒阮亭先生之邸舍年僅五十是歲十月其孤啟涑啟淮扶柩東歸貞以僻處遠方明年始克束芻弔公里第復北走千里慰阮亭先生于都下相向哭竟先生出公行狀命撰旂旐之詞蓋先生至性過人淡悲其兄才未究施年不配德故徧屬同人爲碑銘傳誄以庶幾公之一傳也貞雖非其人然重拂先生

意又以生平之舊朋友之誼有不可辭者遂捧筆而誄之曰

木大根擢山高基扶矯矯維公胄始琅邪

詳余

江左

文獻六代簪裾條分葉散不常厥居新城之宗來  
自東武肇啟山林萁路藍縷樹惇三世乃蒐秣圃  
皋比譚經潁川王府高曾以降濟濟科名司徒司  
馬接迹揚聲顯祖方伯藩屏臨平旬宣著績淞水  
同清猗歟司成實維公父人頌真儒家垂令摹三  
錫龍章益徵永譽公以純懿纂戎洪緒曩第四人



三捷南宮雲騫鳳矯。孟季先登。或典啟事。或領辟  
離。公迺起。蔚爲人宗。維公之生。秀眉湛睞。才若  
春華。傾珠奏玉。雕鶚摩空。驕駟陸叔。雖雁行名。  
豈龍腹。三篋萬卷。厥胷鬱盤。發擿祕要。補綴缺殘。  
聲律之學。上窺杜韓。盪洗色澤。天骨巉岼。憶公十  
齡已露駿爽。雪夜東堂。嘗集少長。共和輞川。獨抒  
異想。日落空山。但聞樵響。場屋之業。先民是程。震  
川具區。大士蘊生。伐毛洗髓。練都研京。屢困益勵。  
風雨雞鳴。甲午恩綸。求賢庠序。遂以我公用充貢。

賦日下喧傳聲華布濩海內名流紵縞交屬就試  
鎖院時維丁酉孰與偕行哲昆良友舟汎明湖社  
標秋柳賦詩唱和播在人口季官邗上岸幘法曹  
奉我二人版輿消搖公思展覲寧敢告勞一舸南  
下破廣陵潮定省之餘弟兄握手闔韻擘牋分鐙  
共牖官閣看梅蜀岡載酒夜雨對牀何樂不有公  
歌鹿鳴值伯南冠徬徨北寺經絡橐籥塵黃日赤  
雨伏風闌蹶躅道路見者辛酸家難已紵大江再  
航青山白紵容與尚羊旣廣朋好亦富篇章豈無



朝市。此境難忘。歲庚在戌。射策楓宸。凌空出羽。觀  
光國賓。季公持節。亦過里門。家庭言歡。莫逾茲辰。  
推星閱霜。閔凶互錯。護草凋零。棣華隕穉。穉淚駢  
枯。肝腸寸鑿。倚廬長號。九京可作。義惟將父。不仕  
州邑。視弟金臺。相依一室。如何斯人。而殞斯疾。秋  
懷十章。竟成絕筆。嗚呼哀哉。天期旣迫。塵游自歇。  
國喪老成家。失良喆。親串哀攢。士林望缺。人孰無  
死。悲公爲烈。悲公伊何。孝恭令德。樸茂溫醇。忠厚  
悱惻。與人退然。若不勝力。僮僮下走。曾無失色。悲

公之遇。志達身窮。策名十載。朝籍未通。隱約連蹇。  
結轡以終。異音同歎。非我昵公。我家公家。兩世蘭  
譜。義貫丹青。誠傾肺腑。鄉邦匪遙。京國或覩。相與  
晨夕。始終無迂。追惟疇昔。我病于牀。時公家居。方  
賦悼亡。猶脩問訊。銀鉤數行。至今藏弄。襲以縹緗。  
當余承訃。家累紛綸。及往哭公。已逾小春。川原結  
慘。雲日爲昏。中懷摧裂。可贖百身。嗚呼哀哉。理數  
茫茫。大化悠悠。桃源晝寂。柏房夜幽。歸魂千里。戢  
身一丘。陳辭誅德。素旄長留。嗚呼哀哉。



其思哀以長其音溫以練

汪蛟門





祭劉丙孫文

於虜是卽丙孫劉君之旅骨而輿櫬以歸者邪以君之賢而乃不克永年以君之才而竟如此以還以憲副公之德而不能使其孳續之少延真所謂可知者人而不可知者天於虜君蓋少傅公之仲子也少傅是時寔任阿衡瀛臺入直而君適生卽因其地錫以嘉名湯餅筵開誕彌厥月睂目如畫玉爲肌骨少傅愛之親爲雜髮雙珠之喻屢形筆札方在襁緥氣可食牛一日千里驟駉驪駟維公

念之可踵前修克繩祖武寧僅三劉此公所以陳  
情丹陛而令其紹伯氏之箕裘也乃君學步長與  
案齊兄弟同列讓棗推梨羣兒嬉戲畫卦沙隄所  
不爲者蹴踘鬪雞泰運伊始處順席亨辟雍教胄  
輦帶增榮胡與禍會喪亂遂下天崩地坼少傳以  
薨熒熒母子畱滯神京鄉關寥廓目怵心驚幸君  
兄弟克自勉旃孤情絕照寄託遺編青熒鐙火雪  
屋寒氊努力榮名用光下泉長公一出遂著先鞭  
掄魁之牘海內爭傳知交忻向忘其迍邐君稱難



弟書卷畱連。舐筆和墨片幅長箋。少傳訶翰舊觀。  
頓還此君。生爲名父之子。而無愧于京兆之阡也。  
君仕沅江。年方英妙。簿領雖微。足資坐嘯。維時鐵  
馬雲集。六詔徵調。紛紜藉君檢料。驅車南下。暫駐  
里門。某等過從。不異弟昆。昕夕握手。斗酒鷄豚。河  
梁之別。黯然銷魂。無言相對。惟見淚痕。亦不過悲  
君所遇之窮。而詎意其遂隔重智邪。別君之初。丁  
寧反覆。書札宣情。不厭促數。云何一往。悽斷心目。  
予亦自疑。豈其不淑。旋來惡耗。傳君賦鵬。猶冀悠

悠語或誤繆杵撞當胃腸迴轆轤問彼家人乃敢  
一哭日月居諸歷寒及燠牛車軋軋僕夫鹿鹿險  
阻間關水濱山麓總帷寂莫素旄颺颺綿綿此恨  
地老天荒何以抒哀聊憑短章何以達誠僅藉椒  
觴將欲慰兩公在天之靈而不得卽欲解戚族鬱  
陶之懷而終覺其彷徨然則吾徒其何術而能自  
已于悲涼也邪於悵哀哉尚饗

以歐蘇之迭蕩爲長句以韓柳之沈鬱爲鍊句

祭文中絕調

汪蛟門



晉傳道士事

傳太全安丘人少。夢間靜四十後始出家爲道士。尋師勞山者三年。南入琅邪掩關靜坐者又三年。凡數年始歸太全。不輕向人言。故人亦莫測其所學。得汶河北岸廢廟新之。其北三十里有塔山者。地故荒寂。太全忽起大刹三殿一堂。門廡齋廚備焉。不五年而工完。又掩關靜坐者六年。偶意有所不可。一昔舍去。如傳舍也。于其東南復剏三教堂。一區規撫亦略如塔山。不三年而成。掩關靜坐者。

又三年復歸汶北前後刼十數刹皆丹楹碧瓦壯麗甲一域所費金錢鉅萬檀施鬱積不求自至嘗一日聚錢一千七百緡太全皆用以庀材鳩工一絲一粒不以資其囊橐晚年無所營唯修汶河木橋其長三百尺每至冬日擔版聚沙自同傭人霜雪滿鬚未嘗告勞見者不知爲八十老人也康熙戊午十月忽示微疾召其弟子日月之六日是吾期也至日夜半具浴竟瞑目端坐听然而笑其徒曰師何笑曰吾笑同行諸真猥庸鄙陋爲不稱也



其徒曰旣仙矣。安有不稱。師曰。每歲道成者。必朝  
帝所。皆有定額。世運遞降。修真者寡。數之不盈。故  
用其次者耳。語訖而瞑。予嘗讀劉向列仙傳。方回  
著于唐師門。顯于夏仇生。葛由紀于殷周。或數十  
年而一見。或數百年而一見。蓋非常之人。非可期  
而獲也。今觀傅翁之言。似亦有例可循。有額可拘。  
至不得已而思其次。是飛騰隱化之事。亦可倣倖  
得之矣。嗚呼。神仙亦可倖致。又奚怪乎塵世之紛  
紛歟。

道士言妄聊藉爲諷

汪蛟門



先友遺墨贊

摺扇若干面凡若干人自一二前輩外皆我先君及伯叔父交游中用代縞紵之贈者每一展閱便想見當日出入裊裊傳觀賓從時不禁泣然泣下久藏恐至放失因檢付工人裝潢成冊或可几案長畱也乃爲贊之其詞曰

紈扇秋風易成捐棄一帙函之斯永厥世適放者踔厲之詞波險者怪偉之迹執卷諦觀某也樹惇某也蘊義清操濯濯英姿揭揭是皆一代之勝流

諸父遇之而成契茲集先友於一堂庶幾風流其  
不墜

從先人手澤起見便非尋常翫物可比此作文

極得體裁處

馬逸塵



松皮石贊

并引

馬子竹船行散東郊入曹氏學圃庭中白松一株  
迺偉奇崛枝柯皆如青銅祗徊久之見霜皮鱗起  
縱橫滿地令奚奴持數片歸粘之素壁作怪石形  
疊嶂層巒掩映向背儼有黃癡筆法從來耽幽之  
士多棲志巖岫或移其好于怪石復浸淫而移其  
好于畫石皆夢山之餘習也至以松皮代畫石則  
又極夢山之變調矣夫木之不可爲石夫人而知  
之也乃竹船以胷中之天機發之遂使氣暈神采

饒有眞理摩挲循覽不能不羨其結構之工妙而  
歎其寓意之離奇也因援筆爲之贊曰

竹頭木屑可以備用未聞松皮作怪石供世有抱  
平。皇。海。嶽。之。癖。者。但。當。采。于。秩。簡。之。山。不。必。求。乎。  
善。構。之。洞。

石名奇敘贊又奇然敘則雋折贊則古峭各極

其勝

王敷彝

雅狀

汪蛟門



獨坐圖自贊

何以不行。疲于津梁。何以不立。夢此石牀。何以不  
鹿聚而麕居。義不苟合當世。當世亦笑之。故不如  
枯槁。宋莫游于無何有之鄉。

落落數言。古甚。峭甚。雋甚。遠甚。

王敷彝





小陶研銘

火土聚質以成。蝕隤糜如鞠通。玉理全刳。不盈內  
行笈。任西東。

霖杖銘

我取鐵幹人憶寒薌。各適其適。何用不臧。

詞思巉畫。卻居然大雅。覺當年坡谷了不異人。  
陳其年





寶墨樓遺翰跋

先君子昆弟三人伯紹海公季觀海公先君子爲仲少相友愛以文章行誼相鏤礪故一時有三張之號至臨池之工則尤不愧雁行云交游中得其楮墨重若璵璠卽片簡寸牘亦皆藏弄爲榮而家之所蓄迺反寥寥料檢篋衍僅得三數紙一二傳後又恐并此三數紙者不復能存暇日倩長洲吳生及兒子在辛雙鉤上石藏之家塾每一展閱恍若聚諸父於一堂而見其染翰有不覺肅然恭躍

然喜欷然以泣者。昔司馬文正公有言。揚子曰。書心畫也。今之人。親沒則畫像而事之。畫像外貌也。豈若心畫手澤之爲深切哉。然則茲刻也。先人靈爽寔所憑依。子孫世守勿僅作寶玉大弓觀可矣。

跋王西樵先生所書佛經

右佛經數帙。新城王西樵先生書于請室中者。余於先生旣沒之四十日。始獲哭其殯宮。阮亭先生出以相示。見其結法精好。意思安閒。種種皆壽者相。而乃竟不得五十年活爲之浩歎。康熙癸丑九



月一日安丘張貞書

跋楊水心所藏曹景完碑

今傳漢人分隸多磨泐不可讀所謂古木崩沙間  
花映竹者僅令人想像于蝸黃蘚綠間此碑明神  
廟時始見渭河沙磧中出世既晚而此又其最初  
搨笠公藏帖雖富吾知必以此爲冠趙文敏云有  
日減無日增可不寶諸康熙甲寅孟冬二日牟山  
張貞識

書所讀史記後

余自髫年卽喜讀太史公書時手一帙無間寒暑  
晝夜然多任意繙閱不問前後也康熙乙卯與翊  
辰表兄共研席且長夏無事因取藏本縱觀之按  
次第立程限對案雜誦疑義相質歷三月而兩周  
焉雖不能上口而弃書冊游息時覺書味猶在曾  
中誠有如涪翁所云者始悔鄉日鹵莽讀書殊爲  
可惜耳嗟乎人至中年後苟境地差進細數平生  
鮮不可悔又寧唯讀書一事邪閏五月十九日閱  
竟漫識



跋董樵西山詩

先生昌陽世胄遁迹海濱近復杜門長齋學道乃以結習未忘溢爲歌詩著作之富幾與身等頗自祕惜不以示人乙卯冬日過我茆齋偶祛其篋得遊山十律快讀數過亟付梓人見先生神明所寄無非與山水相關卽涉迹京雒亦祇成西山之遊則其他可知矣小雪前一日安丘張貞書

書錢牧齋有學集後

聞此書鈔本行世已久每以不得一見爲恨乙卯

秋子應試長安偶過王阮亭先生邸舍始見散帙  
于其案上爾時雖以試期逼人無暇借覽而心竊  
喜其有刻本矣丙辰七月予燕游東歸道出稷下  
乃從書賈購得之繙閱數日不輟丁巳秋冬之際  
老母抱恙忽忽三月予藥裹縈身食寢都廢聊抽  
此帙遣懷因加丹黃焉以神識憤耗點次句讀謬  
誤遂多不復庚之欲他時開卷勿忘此日苦況耳  
十月廿六日雨窻漫識

書賴古堂尺牘後



庚申九月予大病初起不勝煩悶聊以此書銷日  
以其易于見意不滯于久如吾子行所言也廿一  
日閱竟漫識

書歸震川全集後

辛酉春首以大病之餘一切妄念消除殆盡息交  
絕游掩關靜坐披閱震川先生集遂得終卷體氣  
漸復又將遠赴都門此事便廢定力之難如此時  
二月十日久旱忽得小雨亦良辰也

題珂雪堂咏物詞譜

實菴詩文鈔天下間倚聲作詞遂奪宋人之席近  
吳蘭次有名家詞選得珂雪集卽用壓卷流傳江  
左一時皆推爲絕唱吳介茲最愛其咏物諸調手  
錄廿一闕屬王宓草繪爲圖譜凡八幀氣韻生趣  
秀溢楮墨間徐熙野逸黃筌富艷旣兼有之至分  
布配合參差掩映可謂人巧極天工錯矣宓草固  
以寫生名家未必便能盡如此合作良由佳句逼  
出精思因成詞壇雅語實菴出示索題畱几案者  
三閱月盤礴展翫幾不能舍然余旣得附名前後



託以不朽已有偏幸矣何必更效據舷狡獪邪康  
熙癸亥重午日張貞識

鍾伯敬批評漢書跋

吾友馬三如嘗與予論班史古今評者如林幾成  
聚訟讀鍾退谷史懷知先生曾點定此書其筆冷  
峻必能別開生面惜未之見耳予庚申南游偶得  
一本于維揚市中三如亟來索覽以散帙不可讀  
悵悵而去相約裝潢後必首示之以時無良工遂  
藏篋衍長夏無事草草裝成而三如下世已三稔

矣。回思亡友執卷泣然。丙寅六月杞園居士識。

題馬翊辰自賦壽棺詩後

大易有言終則有始天行也因知死生爲斯人之常理然非有高懷曠識則不能脫灑於其間彼分香掩泣破釜失聲者固不足道卽戀戀于平泉樹石午橋雲松者亦詎足稱達今翊辰先生年開六袞安健無恙忽製一棺賦詩示客與表聖之引酌生壙巨山之預賦繭窩寧有區絕邪且世之不壽者皆憂生畏死一念擾擾胷中故能傷人先生筆



舉閒肆懷抱清遙乃爾養怡之福可以永年耄耄  
期頤不求自至若真以爲先生之志氣顏墮情見  
乎辭則失之矣康熙戊辰秋社日表弟張貞敬題

李雲山草書卷後

右雜錄古今詩文一卷益都李雲山先生筆也先  
生諱旻少舉於鄉仕至州守有名成化弘治間卷  
中草法輕俊流便宛然有唐人風度于時吾青士  
大夫皆崇尚實學如楊太守應奎陳尚書經馮孝  
廉惟健其臨池之業未嘗標榜爲名高然作字皆

有根柢結構古雅氣味穠至近日晚生少年纂取  
形似朝學把筆暮便名家卽精細苑翰可折牛腰  
終不堪作諸公屏脚故余見諸公遺墨必購取藏  
弄每與友人論書法便出以相示欲結耳鑒一輩  
人舌也卷首高唐王岱翁篆書入藥鏡一篇瀉整  
茂密亦希有也故並存之康熙己巳三月三日果  
堂張貞識

陳仲醇有言題跋文章家之短兵也鉢底有饒  
龍韞韞脚下有劣虎非筆具神通者未暇辦此



細讀數篇可以無愧 李象先





